



Inatsisartunut ilaasortaq  
Akitsinnguaq Olsen  
-/maani

**Akitsinnguaq Olsenip, Siumut sinnerlugu Inatsisartunut ilaasortap, § 37 naaper-  
torlugu apeqqutaanut allakkatigut akissut.**

**Nerisaqarnermut Siunnersuisoqatigiinnut Inuussutissanillu pilersuiner-  
mut tunngasunik Naalakkersuisunut apeqqutit.**

Inatsisartunut ilaasortap apeqqutaanut qujavunga.

Apeqqutit imaapput:

1. Naalakkersuisut Nerisanut Inuussutissanullu siunnersuisoqatigiinnik Nerisaqarnermut Siunnersuisoqatigiinnut 2009-miilli unittoornikunut taartaa-sussanik pilersitsilersaappat?
2. Kalaallit Nunaanni sukkornermik nappaatillit aammalu uummatikkut taqar-suarmikkullu nappaateqartut amerliartornerat illuatungilerniarlugu sunik suliniuteqalersaappat?
3. Kalaallit Nunaat tamakkerlugu, ingamillu nunaqarfinni isorliunerusunilu Inuussutissanik peqqinnartunik pisiassaqaartuaannarnissaa qulakkeerniar-lugu Naalakkersuisut sunik suliniuteqalersaappat?
4. Pilersuisoq A/S-imut naleqqutinngitsut ingerlatsiner-  
mut tapiissutit allan-  
ngortinnissaannik Naalakkersuisut pilersaaruteqarpat, taamaaliornikkut  
nerisassat peqqinnartut, soorlu naatitat akii immikkut tapiissuteqartalersil-  
lugit?

#### 1-imut)

Naalakkersuisut Nerisaqarnermut Siunnersuisoqatigiit 2009-miilli unittoorsimanerannik ilisimasaqanngillat.

Nerisaqarnermut Siunnersuisoqatigiit 2004-mili Peqqissutsimut Naalakkersuisumit pilersinneqaramik nerisanut timimillu atuinermut tunngasutigut partiilersorluni politikkip avataaniittut, siunnersuisoqatigiittarfittullu atuussimapput. Nerisaqarnermut Siunnersuisoqatigiit sulisinnaassuseqarluinnarput, pilersinneqarnerminniillu akuttunngitsumik ataatsimiittarsimallutik.

Nerisaqarnermut Siunnersuisoqatigiit sulineranni ataqatigiissutaasut tassa kalaallisut nerisanut siunnersuutit qulit, nalinginnaasumik innuttaasunut paasisitsiniaanermi assigiinngitsutigut atorneqartartut.

*Nerisanut timimillu atuinermut tunngasut* iluini Inuunerittap ataani suliniuteqarfiit ilaannik, Nerisaqarnermut Siunnersuisoqatigiit siunnersuutaanik piviusunngortitsisarneq PAA-RISA-mik suleqatiginneqqissaarnikkut ingerlanneqartarpoq. Matumani nerisanut siunnersuutit quliusut aallaavigalugit assigiinngitsunik ilinniartitsiner-  
mut paasisitsiniaaner-

Suliap nr.  
All. Upp. Nr.  
7. oktober 2011  
Postboks 1160  
Oqa: 34 50 00  
Allak:32 55 05  
3900 Nuuk  
Email: pn@nanoq.gl  
www.nanoq.gl

mullu atortussanik piffissap ingerlanerani PAARISA-mik suleqateqarluni suliarinnittoqarsimasoq eqqaaneqarsinnaavoq.

- TV-kkut aallakaatitat naatsut
- Nerisat timigissarnerlu pillugit TV-kkut aallakaatitassiat immikkoortut qulit
- Pisinianut naatsorsuussat allagartarsuaaqqat paasissutissiisut
- Meeqqanut mikinernut inersimasortaannullu "Pinnguaatit peqqinnartut" nerisassat pillugit oqaloqatigiutigaluni pinnguaatit
- Meeqqanut mikisunut 0-imiit 3-nut ukiulinnut, naartusunut milutitsisunullu kiisalu meeqqanut sisamaniit qulinik ukiulinnut aalalluarnissaq nerisassallu pillugit quppersagannguit
- Sammisaniq qanoq suliaqarsinnaanermut isumassarsiat, atuarfinni ilinniartitsisut isummernissaannut tunngavissiat. Aammattaaq atuartut angajullit kiisalu ilinniartitsinerminnut atorsinnaasaat.

PAARISA'p nittartagaani [www.paarisa.gl](http://www.paarisa.gl)-imi ilaatigut Nerisaqarnermut Siunnersuisoqatigiit katitigaanerat, suliaasaasa allassimaffiat, siunnersuisoqatigiillu suliaat il.il. pillugit ukiumoortumik nalunaarusiat pillugit paasissutissanik pissarsisoqarsinnaavoq.

## 2-mut)

Inuit sukkornermik uummallunermillu nappaateqartut amerliartornerat annikillisarniarlugu Naalackersuisut suliniutinik arlalinnik aallarneeersimapput. Tamatumunngalu atatilugu marluk erseqqissaaviginiarpakka:

1. 1. oktober 2010-mi pujortartarneq pillugu inatsimmik sukaterisoqarpoq, tamannalu pujortartarnermik annikillilisinnaasutut nalilerneqarpoq, tassami pujortartarneq inooriaatsimik pissuteqartumik uummallunermik nappaateqalersarnermut patsisaanersaavoq pitsaaliorneqartariaqartoq. Inatsimmik atuutsitsineq pujortartarnermillu allanik annertunerusunik killilersuinerit sakkussaapput annertuumik pingaarutillit.
2. 2011-mi januaarimiit Inuunerittap ataani, sukkortunut iluarsartuullugu pilersaarusiamik ingerlatitseqqinnissamat kiisalu uummatip taqarsuisigut nappaatinut puatsigullu ataavartumik akornutaasumillu nappaateqarnermut nuna tamakkerlugu allanik pitsaaliuinermik suliniutinik piviusunngortitsinerit ineriartortitsinerinullu aningaasanik illikartitsisoqarsimavoq. Sukkortunik, napparsimasunillu aap naqitsineranik qafasippallaartoortunik puatsigullu ataavartumik akornutaasumillu nappaateqartunik isumassuinerit pitsaassusaat siumut sammisumik nalilersorneqartarput.

Innuttaasuni naleqqutinngitsumik inuuneqarneq ukiorpassuit ingerlareernerisigut sukkornermik uummatillu taqarsuisigut nappaateqalersitsisarpoq, taamaattumillu pinaveersaartitsinissamat kingusinaartoqarsinnaanngilaq.


Pitsaaliuinermit peqqinnissamillu siuarsaanernut politikikkut sammivik tassaavoq Inuuneritta, Namminersorlutik Oqartussat ungasinnerusoq isigalugu innuttaasut peqqisuunissaannut tunngasunik suliniuteqarfia. Inuunerittami, 2007-imi pilersinneqartumi 2012-ilu ilanngullugu ingerlasussami, pujortartarneq, nerisat, timimillu atuisarneq imigassarlu pingaarnertut suliniuteqarfiupput. Tamarmik sukkornermik, uummatip taqarsuisigut, KOL-imik, kiisalu kræftimik nappaateqalersinnaanernik pitsaaliuinermik suliniuteqarfiusinnaasut.

**3-mut 4-mullu)**

Uani Malik Berthelsenip, Siumumeersup, KNI Pilersuisorlu sullissinissamik isumaqati-giissuteqarnikkut paarnanik naatitanillu akikinnerusunik pisisinnaanermut periarfissaqar-nermut tunngasumik § 37 naapertorlugu apeqqutaanut nr. 168-imut, Jens B. Frederik-senip akissutaanut 6. september 2011 tunniunneqarsimasumut innersuussivunga.

Neriuppunga qulaani akissutit naammagissagitit.

Inussiarnersumik inuulluaqqusillunga

  
Agathe Fontain



# SIUMUT INATSISARTUNI ILAASORTAATITAT / LANDSTINGSGRUPPEN

23. september 2011

Inatsisartut suleriaasianni § 37 naapertorlugu Naalakkersuisunut apeqqutit imaattut saqqummiup-pakka:

## **Naalakkersuisunut apeqqutit:**

1. Naalakkersuisut Nerisanut inuussutissanullu siunnersuisooqatigiinnik Nerisaqarnermut Siunnersuisooqatigiinnut 2009-mili unittoornikunut taartaasussamik pilersitsilersaarpat?
2. Kalaallit Nunaanni sukkornermik nappaatillit aammalu uummatikkut taqarsuamikkullu nappaateqartut amerliartornerat illuatungilerniarlugu sunik suliniuteqalersaarpat?
3. Kalaallit Nunaat tamakkerlugu, ingammillu nunaqarfinni isorliunerusunilu inuussutissanik peqqinnartunik pisiassaqartuaannarnissaa qulakkeerumallugu Naalakkersuisut sunik suliniuteqalersaarpat?
4. Pilersuisoq a/s-imut ingerlatsinermut tapiissutit allanngortinnissaannik Naalakkersuisut pilersaaruteqarpat, taamaaliornikkut nerisassat peqqinnartuni, soorlu naatitat akii immikkut tapiissuteqartalersillugit?

## **Tunngavilersuut:**

Ukiuni kingulliunerusuni inuit sukkornermik uummatimikkut taqarsuamikkullu nappaateqartut amerliartorput. Tamanna inuit amerlavallaat peqqinnanngitsunik nerisaqariaaseqarnerannik, soorlu nerisanik orsoqappallaanik nerisanillu naleqqutinngitsunik, soorlu fastfood-it nerisassallu kisaannarissat qillertuusamiittunik nerisaqarnerannik patsiseqarsinnaavoq.

Taamaammat ineriartornermut tassunga illuatungiliiniarlutik Naalakkersuisut qanoq tigussaasunik pilersaaruteqarnerat paaserusuppara.

Akitsinnguaq Olsen, Siumut